

Parlamentario sr. Nilo Swaen

A duna Valero status IPC apesar cu no tin garantia cu e refineria ta bai haci inversion riba nos isla



Riba e potret aki nos por mira Parlamentario Nilo Swaen hunto cu su colega di fraccion, sr. Booshi Wever (na man robes) y sr. Adi Thijsen, durante un conferencia di prensa diaranson ultimo.

ORANJESTAD

Parlamentario Nilo Swaen ta declara cu awe man habri Gabinete Eman ta ricibi mas cu 200 miyon florin cu ta bin for di e disputa/arbitrahe entre Valero y Gobierno ariba e BBO ariba exportacion. Gabinete Oduber a introduci e BBO aki na 2007 pasobra MEP ta kere cu tur instancia na Aruba mester por contribui den un forma igual na finanzas publico di pais Aruba. Valero

na momento di introduccion di BBO ariba exportacion tabata goza di un tax holiday te na 2011 otorga contra ley pa Gabinete Eman. Entre 2004-2007 Valero a haci na ganashi 2.8 biyon florin. Pais Aruba a haña cero florin di esaki. Si Valero no tabata goza di e tax holiday aki, pais Aruba lo mester a ricibi 926 miyon florin na impuesto. Valero a scohe pa hiba pais Aruba arbitrahe y nos a sa

di defende nos mes y tur indicacion ta cu pais Aruba lo gana den arbitrahe pa loke ta trata BBO ariba exportacion cu ta hasi cu Valero mester paga Aruba e placa cu ta mará awor aki ariba un cuenta na banco. Nos tur ta corda con AVP den oposicion a opone ariba BBO y especialmente BBO ariba exportacion. Awe man habri, Gabinete Eman ta ricibi e suma aki y, peor aun, ta hasi como sifuera ta su logro.

Pregunta ta, si Gabinete Oduber no a introduci BBO ariba exportacion, awe Gabinete Eman lo por a ricibi e mas cu 200 miyon florin?

Awe nos por constata cu Gabinete Eman a ofrece Valero e status di IPC (Imputation Payment Company). IPC ta un incentivo fiscal cu Gabinete Oduber a introduci na 2003, tempo cu a introduci un cuadro fiscal nobo pa Aruba. Aki tambe AVP den oposicion a critica y a vota contra. Awe nos ta constata cu Gabinete Eman ta ofrece Valero e status di IPC, cu lo haci cu Valero lo bay paga unicamente 6,9% enbez di 28% na impuesto.

Actividadnan petrolero no ta aparese riba e lista pa cualifica pa un status di IPC, pasobra hustamente por bin na remarke solamente, manera hotelnan na Aruba, si por demostra cu ta hasi inversionnan pa upgrade e compania y bay na un nivel mas halto. Tambe a inclui inversionnan riba e lista di IPC cu ta dirigi ariba mehoracion di nos medio ambiente. Awe nos ta mira cu un Gobierno cu tempo e

tabata den oposicion tabata contra di IPC y contra di un cuadro fiscal nobo, awe ta hasi uso di e ley aki pa beneficia un refineria cu no ta parese riba e lista di cualificacion pa IPC. Pregunta ta, con por ta posibel cu den e pais aki e mesun incentivo fiscal ta conta pa companianan cu ta percura pa haci inversionnan na beneficio di nos medio ambiente y tambe ta conta pa companianan cu ta causa polucion na nos medio ambiente. Mas leu, esaki ta significa tambe cu Gabinete Eman ya no ta di acuerdo mas pa ratifica e tratado di KYOTO y siguiente tratadonan cu tin como meta pa combati polucion?

Cu tur es hechonan ariba menciona, en corto, MEP no por conclui otro cu awor Aruba tin un Gobierno oportunista. AVP a grita hopi den oposicion y a opone maneho di Gabinete Oduber, pero al fin al cabo Gabinete Eman ta haciendo uso di tur locual Gabinete Oduber a para y a lucha pe y awo ta haci como sifuera ta su logronan. Tur esaki sin cu sr. Swaen a toca ainda e tema di inversionnan na Aruba